

खबरां

- प्रधानमंत्री नरेंद्र मोदी होरें इज्राइल दे प्रधानमंत्री हुं'दे कन्नै फोन पर गल्लबात कीती, जिस दरान दौनें नेताएं भारत ते इज्राइल दी सामरिक सांझ भ्याली गी मजबूत बनाने दे तौर-तरीके पर चर्चा कीती।
- विदेश मंत्री डॉ. एस जयशंकर होरें पाकिस्तान दी सख्त निंदा करदे होई आखेआ जे ओहू केई दाहके थमां बड्डे शैहरें च शरेआम आतंकवादिएं दे सिखलाई कैंप चलांदा आवा'रदा ऐ।
- दिल्ली पुलसै गैर कनूनी कब्जे हटाने आहले अभियान दरान जन्नी-बट्टे मारने दे आरोप च 5 जनें गी हिरासत च लेइयै एफ.आई.आर दर्ज कीती ऐ, इस हमले च 5 पुलस कर्मी जखमी होए दे न।
- राश्ट्री जरनैली शिड़के सरबंधी भारती प्राधिकरण नै 6 लेन आहले बैंगलुरू-कडपा-विजयवाड़ा आर्थिक गलियारे दे वनवोलू थमां वंकरवुंडा हिस्से पर बिटुमिनस कंक्रीट बछ्छाइये द'ऊं गिनीज़ वर्ल्ड रिकार्ड बनाए न।
- उत्तर भारत च कड़ाके दी ठंड ते घनी धुंध दा प्रकोप जारी ऐ, जिस करी रेल ते ब्हाई सेवां प्रभावित होआ'रदियां न।
- आई.सी.सी नै मर्दे दे टी-20 विश्व कप दे मकाबले भारत थमां बाहर करवाने दी बंगलादेश क्रिकेट बोर्ड दी गुजारिश गी खारिज करी दित्ता ऐ।
- ते बैडमिंटन च भारत दी पी.वी सिंधू मलेशिया ओपन च महिलाएं दे सिंगल्स वर्ग दे प्री-क्वार्टर फाइनल च पुज्जी गेइयां न।



Modi-Netanyahu

प्रधानमंत्री नरेंद्र मोदी होरें इजराइल दे प्रधानमंत्री बेन्यामिन नेतन्याहू हुं'दे कन्नै टैलीफोन पर गल्लबात कीती ऐ। उंनें भारत ते इजराइल दी रणनीतिक सांझ-भ्याली गी होर मजबूत करने दे तरीके पर चर्चा कीती। प्रधानमंत्री हुं'दे दफतरै मूजब इजराइल दे प्रधानमंत्री होरें श्री मोदी होरें'गी फोन कीता। दौनें नेताएं सांझे लोकतांत्रिक मुल्लें, गैह्हे आपसी विश्वास ते दूरदर्शी नजरिये दी बिनाहू उप्पर भारत ते इजराइल दी रणनीतिक सांझ-भ्याली गी होर मजबूत करने लेई सांझी प्राथमिकताएं दी पंछान कीती। उंनें आतंकवाद दे सभनें रूपें ते अभिव्यक्तिएं गी दना बर्दाश्त नेई करने दे अपने नजरिये गी दोहराया ते इस खतरे कन्नै लड़ने दी अपनी बचनबद्धता दी तस्दीक कीती। दौनें नेताएं इकदुए गी नमें ब'रे दिआं शुभकामनां दित्तिआं ते दौनें मुल्ले दे लोके लेई शांति ते समृद्धि दी कामना बी कीती।



PM-Somnath

प्रधानमंत्री नरेंद्र मोदी औंदे ऐतबारें गुजरात च सोमनाथ स्वाभिमान पर्व च हिस्सा लैडन। इस पर्व दे तैह्त सोमनाथ च बरे भर कार्यक्रम आयोजित कीते जाडन। सोमनाथ पर होए दे पैह्ले हमले दे इस बरे 1 जहार बरे पूरे होआ'रदे न। सोमनाथ स्वाभिमान पर्व 8 थमां 11 जनवरी तगर मनाया जाह्य जेह्दे च पूरे बरे आध्यात्मिक, सांस्कृतिक ते समाजी गतिविधियां होडन। एह उत्सव सोमनाथ मंदर गी नमें सिरेआ संवारिये तैयार कीते जाने दी 75मीं बरेगंड दे कन्नै होआ'रदा ऐ। मंदर गी नमें सिरेआ तैयार करने दे बाद सरदार वल्लभभाई पटेल हुं'दी अगुवाई च एहदा उद्घाटन बरे 1951 च होआ हा। प्रधानमंत्री होरें हाल दे अपने इक लेख च लिखेआ जे इस मंदरै पर हमला करने आले आपू इतिहास च गोआची गे पर एह मंदर भारती जनता दी बेमिसाल दलेरी दा सबूत बनियै अज्ज बी खडोते दा ऐ।

<><><><><><>

EAM-Pakistan

बदेश मंत्री डाक्टर एस. जयशंकर होरें पिच्छले केई दहाकें थमां बड्डे शैहें च सरेआम आतंकवादिएं दे सिखलाई कैंप चलाने लेई पाकिस्तान दी सख्त निंदेआ कीती ऐ। उ'नें आखेआ ऐ जे पाकिस्तान आसेआ लम्मे चिरै थमां आतंकवाद गी खुल्ला समर्थन दित्ता जा'रदा ऐ जिस करी समकालीन वैश्विक कूटनीति च पाकिस्तान कन्नै भारत दे रिश्ते इक अपवाद बने दे न। डाक्टर जयशंकर होरें एह गल्ल अज्ज लक्समबर्ग च भारती समुदास दे लोकें कन्नै गल्लबात करदे होई आखी। उ'नें आखेआ जे अज्ज दुनिया दा कोई बी मुल्लख ऐसा नेई ऐ जिन्नै अपने गवांडिएं खलाफ इस चाल्ली दिआं नीतियां अपनाई दिआं होन जिस चाल्ली दिआं नीतियां पाकिस्तान अपनांदा आया ऐ। उ'नें आखेआ जे भारत, अपनी बदेश नीति गी आकार दिंदे बेल्ले इसी अनदिक्खा नेई करी सकदा। बदेश मंत्री होरें पाकिस्तान दे खलाफ, आपरेशन सिंदूर तैह्त कीती गेदी भारत दी कार्रवाई गी लेइयै पच्छमी मुल्लखें दे दोहरे चरित्तर दी बी निंदेआ कीती। वेनेजुएला च अमरीका आसेआ चलाए गेदे फौजी अभियान बारै गल्ल करदे होई डाक्टर जयशंकर होरें आखेआ जे दक्खनी अमरीकी मुल्लख च हाल दिएं घटनाएं गी लेइयै भारत चिंतित ऐ। यूरोप कन्नै सरबंधें दे बारै च बोलदे होई बदेश मंत्री होरें आखेआ जे खित्ते च इस बरे सरबंधें च होर उछाल दिक्खे जाने दी मेद ऐ। उ'नें यूरोपी मुल्लखें कन्नै भारत दे सरबंधें गी तगडा बनाने च प्रवासी भारतीयें दी भूमिका दी सराहना कीती।

<><><><><><>

Chhatisgarh-Naxalites

छत्तीसगढ़ दे सुकमा जिले च अज 26 नक्सलियें आत्म समर्पण करी दित्ता जिंदे चा 13 नक्सलियें पर कुल 65 लक्ख रुपें दा ईनाम हा। सुकमा जिले दे एस.पी किरण चौहान हुंदे मुजब, 7 महिलाएं सने इ'नें नक्सलिएं पूना मार्गेम पुनर्वास पैह्ल दे तैह्त पुलस ते सी.आर.पी.एफ दे वरिश्ठ अधिकारिएं सामने आत्मसमर्पण कीता। चौहान होरें दस्सेआ जे एह माओवादी पीपल्स लिब्रेशन गुरिल्ला आर्मी बटालियन, दक्खनी बस्तर डिविजन, माड़ डिविजन ते आंध्र ओडिशा सीमा डिविजन च सरगर्म हे ते छत्तीसगढ़ ते ओडिशा दे बक्ख-बक्ख इलाकें च होई दिएं घटनाएं च शामिल हे।



Delhi Police FIR

दिल्ली पुलिस नै कल रातीं परानी दिल्ली च चलाए गेदे demolition अभियान दरान होए दे पथराव दी घटना कन्नै सरबंध च 5 लोकें गी हिरासत च लैता ऐ ते एफ.आई.आर दर्ज कीती ऐ। पत्रकारें कन्नै गल्ल करदे होई पुलिस उपायुक्त निधिन वलसन होरें दस्सेआ जे दिल्ली नगर निगम नै उच्च न्यायालय दे निदेशकें दे मताबक एह अभियान चलाया हा। उनें दस्सेआ जे इस घटना च 5 पुलिसकर्मी जखमी होए हे।



Air Marshal

एयर मार्शल संजीव धुरतिया होरें आखेआ ऐ जे बिजली ते उर्जा प्रणालियां देसै दे ब्हाई खेत्तर दी समर्थ दिआं जीवनरेखा ना मिलट्री पावर सिस्टम्स इंडिया-2026 दे उद्घाटन समारोह च एयर मार्शल होरें आखेआ जे एह खेत्तर प्रदर्शन, पेलोड, साज-समेयान सरबंधी स्थिरता ते पर्यावरण सरबंधी प्रभास गी तय करने च महत्वपूर्ण ना। उनें आखेआ जे रक्षा ते ब्हाई खेत्तर दिआं प्रणालियां, हुन छडी सहायक भूमिका निभाने आलियां नेई हैन, सगुआं एह इक ऐसी शक्ति न, जेहडी परिचालन गति ते लचीनेपन गी आकार दिंदी ऐ। एयर मार्शल होरें आखेआ जे सशक्त प्रणालिएं दे निर्माण लेई सरकार शोध, उद्योग ते शिक्षा जगत गी संगठित होने दी बडी सख्त लोड ऐ।



GDP

असल सकल घरेलू उत्पाद यानि जीडीपी च माली बरे 2025-26 च 7 इशारिया 4 फीसद दे बाहे दा अंदाजा ऐ। पिच्छले माली बरे च एह विकास दर 6 इशारिया 5 फीसद ही। चालू माली बरे लेई जीडीपी दे पैहले अग्रे अंदाजें मताबक, असल जीडीपी दा स्तर 201 लक्ख करोड़ रुपें शा मते रौहने दा अनुमान ऐ, जिसले के 2024-25 लेई एहदा अनुमान 187 लक्ख करोड़ रुपें शा मता हा। सांख्यिकी ते कार्यक्रमें दी अमल-आवरी सरबंधी मंत्रालय ने आखेआ ऐ जे बपार, होटल, ट्रांसपोर्ट, संचार ते प्रसारण दे खेत्तरें कन्नै सरबंधत सेवाएं च इस माली बरे दे दरान 7 इशारिया 5 फीसद दे बाहे दा अनुमान ऐ।



High Court Dushyant

दिल्ली हाईकोर्ट ने कांग्रेस ते आम आदमी पार्टी गी अंकिता भंडारी हत्तेआकांड च बीजेपी नेता दुष्यंत कुमार गौतम कन्नै जुडी दिआं सब्बै सोशल मीडिया पोस्टां 24 घैंटें दे अंदर हटाने दे निर्देश दित्ते ना। दुष्यंत गौतम आसेआ दायर मानहानि दे मुकदमे पर अंतरिम आदेश दिंदे होई न्याऽमूर्ति मिनी पुष्करणा होरें दौनें राजनीतिक दलें गी बीजेपी दे राश्ट्री सचिव गी हत्तेआ मामले च कथित वीआईपी करार दिंदे होई उनें गी निशाना बनाने आहली कोई बी समग्री, पोस्ट करने थमां रोकी दित्ता।

अदालतै उर्मिला सनावर ते उत्तराखंड प्रदेश कांग्रेस कमेटी सने होरनें लोकें ते संस्थाएं दे खलाफ बी अंतरिम आदेश पारित कीता। न्याऽधीश होरें स्पष्ट कीता जे 24एं घैंटें दे अंदर-अंदर जेगर समग्री नेई हटाई गई तां सोशल मीडिया प्लेटफॉर्म दे नियमें मूजब उसगी हटाई दित्ता जाहगा।

<><><><><><>

Iran

ईरान च चला'रदे राष्ट्रव्यापी विद्रोह च इक महत्वपूर्ण मोड़ आया ऐ। प्रदर्शनकारियें कल अब्दानान शैहरा पर कब्ज़ा करी लैता। एहू आंदोलनकारियें दे कब्जे च औने आह्ला पैहला शैहर बनी गेआ। ईरान दे मनुक्खी अधिकारें सरबंधी संगठन दे मताबक इ'नें झड़फें च हुनै तगर 5 नाबालिगें सने 27 लोक मारे गेदे न। तेहरान च याफताबाद सने केई प्रमुख बपारिक जिलें च बी इससै चाल्ली दे हालात दिक्खने गी मिला करदे न, जित्थे आर्थिक मुश्कलें ते बदेश नीति दिएं प्राथमिकताएं गी लेइयै लोकें च गुस्सा बधा करदा ऐ। इ'नें बरोध प्रदर्शनें दे चलदे बेदखल कीते गेदे युवराज रजा पहलवी ने संगठित तौर पर राष्ट्री बरोध प्रदर्शनें दा आह्वान कीता ऐ।

<><><><><><>

Bangladesh Hindu Youth

बंगलादेश दे नौगांव च पैसे खुस्सने दे आरोप च मुकामी लोकें आसेआ पिच्छा कीते जाने पर 25एं ब'रें दे हिंदु युवक मिथुन सरकार दी नैहर च छाल मारी देने करी मौत होई गई, जेह्दे मगरा इलाके च व्यापक तनाऽ फैली गेआ। एहू घटना ऐतवार दपैह्री महादेवपुर उपज़िला दे चकगौरी बजार इलाके च होई। मरोने आह्ला मिथुन सरकार, महादेवपुर उपज़िला दे भंडारपुर ग्रांऽ दे बसनीक पिंकू सरकार दा पुत्तर हा। ओह्दा शव मंगलवारें दपैह्री चकगौरी बजार दे नेडे इक नैहर थमां बरामद कीता गेआ। पुलस ते मुकामी बसनीकें मूजब किश नौजवानें चोरी दे शक च मिथुन दा चकगौरी बजार थमां पिच्छा कीता। नस्सने दी कोशश करदे होई ओहू नेडे दी नैहर आह्ली बक्खी द्रौड़ेआ ते पानी च छाल मारी दित्ता। नैहर च उतरने दे किश गै समें परैन्त ओहू लापता होई गेआ हा।

<><><><><><>

ISRO

भारती अंतरिक्ष अनुसंधान संगठन इसरो इस म्हीने दी 12 तरीक गी PSLV-C-62 मिशन दा प्रक्षेपण करने जा'रदा ऐ। इसरो नै अपनी इक सोशल मीडिया पोस्ट पर घोशणा कीती ऐ कि उपग्रैह गी आंध्र प्रदेश दे श्री हरिकोटा स्थित सतीश धवन अंतरिक्ष केंद्र थमां संगारे 12 जनवरी गी बडलै 10 बज्जियै 17एं मिनटें पर गासै च छुड़ेआ जाहगा। एह्दे तैहत भारत सने होरनें किश देशें दे 18 उपग्रैह बी प्रक्षेपित कीते जाडन। इस मिशन दा मुख पेलोड पृथ्वी अवलोकन उपग्रैह EoS-N-1 ऐ।

<><><><><><>

NHAI-Record

जरनैली शिडकें सरबंधी भारती प्राधिकरण नै कन्नोकन्नी 6एं गड्डिउएं दे लंघने दी छमता आहले बैंगलुरू-कडपा-विजयवाडा आर्थिक गलियारें दे वनवोलू थमां वंकरवुंडा खंड पर बिटुमिनस कंक्रीट

बछ्वाइयै 2 गिनीज़विश्व रिकार्ड बनाए ना अपनी सोशल मीडिया पोस्ट च एन.एच.ए.आई नै दस्सेआ ऐ जे 343 किलोमीटर लम्मा बैंगलुरु कडपा विजयवाड़ा आर्थिक गलियारा कर्नाटक ते आंध्र प्रदेश बश्कार अंतरराज्तीय संपर्क गी निग्गर बनाग। एह्दे नै तेज, सुरक्षित ते निर्विघ्न आओजाई दे राएं बपार, सैलसफा ते क्षेत्रीय आर्थिक विकास गी बी बढ़ावा थ्होग।

<><><><><><>

AIIMS Jammu

एम्स जम्मू नै इक महत्वपूर्ण उपलब्धि हासल कीती ऐ जिन्नै 1 ज्हार 856 करोड़ रपे दी परियोजना दा 100 फीसद भौतिक निर्माण पूरा करी लैता ऐ। एह जम्मू-कश्मीर च स्वास्थ्य सेवा अवसंरचना गी मजबूत करने दी दिशा च एक क्रांतिकारी गैंऽ ऐ। प्रगति प्लेटार्म दे सहयोग कन्नै प्रधानमंत्री हुंदे नेतृत्व च होई दी समीक्षाएं चजिमी ते उपयोगिता सरबन्धी प्रमुख मुद्दें गी हल करने च मदद कीती जिसलै जे केंद्र ते केंद्र शासित प्रदेश बश्कार मजबूत समन्वय नै परियोजना दे क्रियान्वयन च तेजी आंदी ऐ, समें पर इसी चालू करना यकीनी कीता। अधिकारियें दा आखना ऐ जे एह संस्थान गुणवत्तापूर्ण स्वास्थ्य सेवा तोड़ी पुज्ज दा विस्तार करोग ते परिकल्पना गी साकार रूप देग। एम्स जम्मू इक ऐतिहासिक केंद्र बनाने दी मेद ऐ जेड़ा उन्नत चिकित्सा सेवा प्रदान करोग ते क्षेत्र च स्वास्थ्य सेवा मानकें गी बढ़ावा देग।

<><><><><><>

Tourism-Inflow

कश्मीर घाटी च सैलानिएं दी आमद च तेजिया कन्नै बाद्दा दर्ज कीता जा'रदा ऐ कीजे इत्थुआं होइयै जाने आह्ले सैलानी इस मौसमा च घाटी दी खूबसूरती गी बयान करियै होरनें गी बी इत्थे औने लेई प्रेरित करदे ना। केइएं सैलानिएं दा आखना ऐ कि दुनिया भरै दे सैलानी थाहें च बी कश्मीर घाटी दी अपनी पंछान ते आकर्षण ऐ टंगमर्ग कश द्रुंग थाह् ठंडर कारण अद्दा जम्मी चुके दा झरना बी इनें दिनें सैलानिएं लेई आकर्षण दा केंद्र बने दा ऐ ते बर्फू नै खटोए दे प्हाड़ स्यालू खेड्डू गतिविधिएं ते फोटू खिच्चने लेई बनकदियां थाह्णां ना। इक मकामी कारोबारी दा आखना ऐ जे इस सयाले सैलानिएं दी गिनतरी च बाद्दा होने नै सब्बै खुश न, कीजे उंदा कारोबार बधै करदा ऐ, आर्थिक गतिविधिएं च बाद्दा होआ ऐ, सैलानिएं दे रूपै च आवा करदे महमानें दा सुआगत करने दा उनेंगी मौका थ्होआ करदा ऐ।

<><><><><><>

Cold Wave

समूलचे उत्तर भारत च जबरदस्त ठंडू दा प्रकोप बरोबर जारी ऐ ते घनी धुंध दे कारण रेल ते ब्हाई सेवाएं पर बी बड़ा माड़ा असर पवा करदा ऐ। मौसम विभाग अगले 2 दिनें दरान पंजाब, हरियाणा, चंडीगढ़, ओडिशा ते राजस्थान च जबरदस्त सीत लैहर जारी रौहने दी पेशनगोई कीती ऐ। तोआई, उत्तरी रेलवे दा आखना ऐ जे दिल्ली पुज्जने आहिलियां करीब सब्बै रेल गड्डियां अपने तैह समें कोला 3 कोला 5 घंटे चिरें पुज्जा करदियां ना।

<><><><><><>

ICC Rejected

अंतरराष्ट्री क्रिकेट काउंसल - आईसीसी ने बांग्लादेश क्रिकेट बोर्ड - बी.सी.बी. दे टी-20 विश्व कप 2026 दे बांग्लादेश दे मैच भारत थमां बाहर कराने दी याचिका खारज करी दित्ती ऐ। बी.सी.बी ने सुरक्षा कारणें दे चलदे टी-20 विश्व कप लेई भारत औने थमां मना कीता ऐ। बांग्लादेश च हिन्दुएं दी हत्तेआ दे बरोध च केई इलाकें च होआ'रदे बरोध प्रदर्शनें दे मगरा बी.सी.सी.आई ने मुस्तफिजुर रहमान गी आई.पी.एल थमां हटाई दित्ता ऐ। दौनें संस्थाएं बश्कार होई दी वर्चुअल बैठक च आई.सी.सी ने आखेआ जे बी.सी.बी दे कोल अखीरी समें च मैच कुसै होर थाह् मुंतकिल करने दी कोई जायज वजह नेई ऐ, कीजे बी.सी.सी.आई ने बांग्लादेश क्रिकेट टीम लेई राष्ट्र अध्यक्ष दे बरोबर दी सुरक्षा दा वादा कीता ऐ। हालांकि, बीसीबी ने आई.सी.सी. कन्नै कुसै बी चाल्ली दी आधिकारिक पुष्टि हासल करने थमां नां कीती ऐ।

<><><><><><>

Badminton

भारत दी पीवी सिंधु मलेशिया ओपन बैडमिंटन टूर्नामेंट च महिलाएं दे सिंगल्स वर्ग दे प्री-क्वार्टरफाइनल च पुज्जी गेइयां ना। उं'दे अलावा भारत दे चिराग शेट्टी ते सात्विकसाईराज रंकीरेड्डी दी मर्दे दी डबल्स जोड़ी बी अपने वर्ग दे अगले दौर च पुज्जी गेई ऐ। सिंधु होरें चीनी ताइपे दी सुंग शुओ-युन गी सिद्दे सैटें च 21-13, 22-20 कन्नै हराया। दुनिया दी 8में नम्बरै दी खड्डारन सिंधु अगले दौर च जपान दी तोमोका मियाजाकी कन्नै मुकाबला खेड्ड। उत्थे गै, सात्विक ते चिराग दी जोड़ी ने चीनी ताइपे दे यांग पो ह्सुआन ते ली झे-हुए गी 21-13, 21-15 कन्नै हराइयै प्री-क्वार्टर फाइनल च थाहर बनाई। हुन उं'दा मुकाबला मलेशिया दे जुनैदी आरिफ ते रॉय किंग याप कन्नै होग।

<><><><><><>